

Aur e bronz per Annina Tomaschett

Als campiadis svizzers da tir dalla distanza da 10 m la fin dall'jamna vargada ha *Annina Tomaschett* da Trun contonschiu duas ga il podest en categorias cun buis. Ensemen cun *Lars Färber* da Favugn ha la tiradura sursilvana gudignau pil Grischun la concorrenza dils teams mischedai cun buis, consistentes mintgamai d'ina dunna ed in um. Gia el miez final da quella concorrenza havevan els contonschiu il meglier resultat. In'excellenta prestaziun ha Annina Tomaschett era mussau ella concorrenza singula dallas dunnas. Suentar haver contonschiu il tschunavel meglier resultat ella qualificaziun eis ella semigliurada el final e ha la fin finala recaltgau la medaglia da bronz.

In fetg bien resultat ha *Alicia Berther* da Rueras contonschiu culla buis ella categorias dallas mattatschas sut 10, respectivamein 15 onns. Ella ei daventada quarta e ha munchentau per pauc il podest. *Anja Cadalbert* da Sevgein ei daventada 16avla e *Chiara Weishaupt* da Degen 35avla tier las junioras sut 19, respectivamein sut 21 onns.

Fetg bunas rangaziuns han era ulteriuras Grischunas ed ulteriurs Grischuns contonschiu la fin dall'jamna a Berna. *Lars Färber* ha sittau il tierz meglier resultat tiels umens. *Gregory Emmenegger* da Schmiten ei daventaus secund el final cun pistola dils umens. *Sybill Tscharner* d'Aschera ei daventada otgavla el final dallas dunnas cun pistola e *Sina Flütsch* da St. Antönien ha contonschiu igl excellent secund rang ella concorrenza cun pistola dallas junioras. Ella concorrenza mischedada dils juniors cun pistola ei il team *Sina Flütsch/Mario Wolf* daventaus quart. (fmr/hh)